

Mbanjcuengh Gyaeunde

□ Lij Banghgyangz Luz Yaujli

Aen sigij gaxgonq 80 nienzdah cogeiz, raq rumzcin gaijgwz hailangh bongj doh guekcoj diegdeih, Cungguk gwnzlaj vunz hauxseng roxaeuz vunz cungnienz cungj gaenxmaenx un saw gauj daihhag, doeg daihhag bienq-baenz haujlai vunz baenz ciuhvunz maqmuengh caeuq gyaepgouz ho.

Seizhaenx, Daegmingz gauhcungh sathag le, hix yunghsim camgya gauhgauj, hoeng, faensoq okdaeuj le, Daegmingz ca song faen cij ndaej hwnj cunghconh, siengj caiq un saw bi dem, hoeng bohme hix youq ndawranz guh hongreih daiq dwgrengz lo, hix mbouj caiq miz ngaenz bangbouj de lo. Saedcaih mbouj miz banhfap le, Daegmingz cijndaej dauqma mbanjranz.

Hoeng, mbanjranz Daegmingz lueg laeg bya sang, doengh aen bya sang haenx goengq rangh goengq, gwnz bya lienx faex cungj gig noix ndaej majhung. Ndaw mbanj mbouj miz nazraemx, reih hix gig noix, ngoenzlaeng yaek guh maz hong daeuj ciengx bak bonjfaenh ne? Nanzdauh caen aeu hwnj bya bae raemj fwnz gai ciengx bak ma?

Cingq mbouj rox yaek baenzlawz guh seiz, Daegmingz dingqnyi ndaw souhyinhgi hix boq naeuz, Haijnanzdauj gag laebguh sengj le, ginghei hwnghat ndaej gig vaiq, yaek aeu haujlai vunz bae guhhong, vunz gak dieg hix nyoengx bae Haijnanzdauj ra hong. Baenzneix, Daegmingz naemj bae naemj dauq le, couh siengj bae gizde ra hong guh. Hoeng, de mbouj gag okdou gya gvaq, bohme hix mbouj miz geijlai ngaenz. Daegmingz cijndaej hwnj haw bae ra lauxsae caeuq doengzhag ndei doxyaeng, iu doengzhag ndei caez doxbuex bae Haijnanzdauj ra hong guh. Cingqngamj, miz song daeg doengzhag hix siengj bae. Yienghneix, sam vunz couh dox-

buenx naengh heiqci vuenh naengh ruz buet bae daengz Haijnanzdauj lo.

Aenvih daengx guek gak dieg cungj miz vunz nyoengx daeuj, bouboux nyinhnaeuz Haijnanzdauj ngamq laeb sengj, haengjdingh miz haujlai hong caj vunz bae guh. Gizsaed mbouj dwg yienghneix, Daegmingz sam vunz ra bae ra dauq, cienq gwnz cienq laj, caiq aenvih gyoengqde ngamq gauhcungh sathag, cijndaej youq ndaw gunghcangj roxaeuz giyez iq ra ndaej hong guh. Daegmingz couh youq ndaw gunghcangj cauhguh boiqgienh fansa, guh ndaej gienh ndeu hawj di cienz, gij ngaenz hong daengz ndwen byai caez fat. Guh ndaej lai gienh couh ndaej ngaenz lai. Daegmingz ngamq haeuj gunghcangj seiz, faen caeuq dahsau heuhguh Dahlienx caemh cuj ndeu, song vunz dox boiqhab caez guh.

Dahlienx dwg vunz bonjdieg lajmbanj, gauhgauj seiz hix dwg cengca saek cib faen mbouj ndaej bae doeg daihhag. Seizhaenx, rogguk miz haujlai giyez daeuj lajmbanj Haijnanzdauj banh gunghcangj, yienghneix guh mboujdan ndaej gyangq-daemq cienzhong, lij ndaej noix cienzgoek dem. Ndaw ranz Dahlienx baengh co diegnamh hawj gunghcangj, mbouj yungh geijlai nanz couh bienqbaenz "hohfanhmaenz" lo. Seizhaenx, youq daengx guek daeuj gangj, "hohfanhmaenz" couh dwg suenq ranz miz cienz, hix dwg vunz fouqmiz lu. Hoeng, Dahlienx daiq lij iq couh dwg dahsau roxsoq gaenx guhhong ndeu, de mbouj haengj youq ndawranz ndwi, couh haeuj ndaw gunghcangj daeuj dajgoeng. Aiq dwg yienzfaenh daengz luba, Dahlienx cingqngamj caeuq Daegmingz faen daengz doengz aen cehgenh ndeu, cehgenh cujyin youh faen song vunz guh cuj ndeu.

Daegmingz caeuq Dahlienx

mboujdan rox yawj sawgangjmingz cauhguh boiqgienh fansa, hix gig haengj cam saefouh, youh daegbied gaenx doenghfwngz, song vunz cauhguh boiqgienh fansa youh boiqhab ndaej gig ndei. Daegmingz da raeh fwngz vaiq, Dahlienx saeqsim fwngz riengj, song vunz guh gienh baenz gienh, gig noix miz guh yaez guh ak. Yienghneix, song bouboux moix ndwen cungj ndaej cienzhong beij bouboux lai baenz boix, lauxbanj hix gig haengjheiq song bouboux de.

Daegmingz caeuq Dahlienx mboujdan youq guhhong seiz doxgap ndaej ndei, bingzseiz song vunz ganggoj hix dawzbanj raixcaix. Dahlienx youh haengj daiq Daegmingz dauqcauw bae ngonzyawj gij gingjsaek Haijnanzdauj, Daegmingz mboujlwnh Dahlienx bae gizlawz hix cungj haengj riengz laeng bae. Couh yienghneix, ndwenngoengz gig vaiq couh gvaqbae bi ndeu lo, Daegmingz caeuq Dahlienx ngoenzngoengz caez guhhong, song vunz ngaenz caeuq ingj cungj liz mbouj ndaej lo.

Miz ngoenz ndeu, yaek daengz seiz roengzban, Dahlienx sawqmwh doiq Daegmingz naeuz: "Gomingz, haemhneix cingj mwngz be ndaw ranz gou gwn haeuxcaez ba?" Gangj sat le, Dahlienx lij gag najhoengz hwnjdaej.

Ndawsim Daegmingz sikhaek raeujrubrub, hix riengjret han naeuz: "Ndei ha, gou couh riengz mwngz bae."

Bohme Dahlienx yawjraen miz hek daeuj ranz, hix yiedcingz dakdaih Daegmingz, gyoengqde roxnyinh Daegmingz vunz baenzmbauq youh roxsoq, ndawsim hix gig maij Daegmingz.

Daegmingz hix gig siengj daiq Dahlienx baema mbanjranz hawj bohme de yawjyawj, hoeng, youh

roxnyinh ndawranz bonjfaenh gungz-hoj lai, mbouj miz saenqsim, geij baez siengj haibak iu Dahlienx bae mbanjranz bonjfaenh guhcaemz, hoeng baezbaez cungj mbouj gamj gangj okbak daeuj.

Gaen cieng seiz, Daegmingz caeuq Dahlienx fwngz yien fwngz youq gwnz roen youzbyaij, Dahlienx doq byaij doq doiq Daegmingz naeuz: "Gou siengj riengz mwngz bae ndaw ranz mwngz gvaqcieng." Gangj sat, hix mbouj caj Daegmingz hoizdap, Dahlienx fwngz ndeu baez baet diuz mengqraez bonjfaenh, fwngz ndeu lijdwg gaem ndaet gij fwngz Daegmingz dwk.

Daegmingz sikhaek roxnyinh gij eiqsei Dahlienx, hoeng, Daegmingz lijdwg ngeixvaeg yaep ndeu le cij yaengyaeng han naeuz: "Lienznuengx, mbanjranz gou caen gungzhoj raixcaix. Gou okdou seiz, ngoenz goengfaen cij dij 8 faen ngaenz, ngamq gaeuq cawx bau 'densi' baiz iencaij ndeu. Hix ndaej yienghneix gejnaeuz, bouboux guhhong ak ndeu, daengx bi guhhong souhaeuj mbouj daengz 400 maenz ngaenz. Mbanjranz gou hai da muenghyawj gvaqbae, daengx benq cungj dwg ranznaez, danghnaeuz ranz lawz miz aen danci ndeu roxaeuz miz aen souhyinhgi hix ndeu couhsuenq ranz fouqmiz lo. Gou couh dwg aenvih ndawranz gungzhoj lai, cij buet okdaeuj dajgoeng bw, mwngz nyienh baenz ciuhvunz gaen gou gwn haemz souh hoj ha?" Daegmingz caen mbouj nyaenx hawj Dahlienx baenz ciuhvunz riengz bonjfaenh gvaq saedceij gungzhoj, engq sij mbouj ndaej Dahlienx lizhai bonjfaenh, cijndaej cengq mbei dwk byoengq gyadaej bonjfaenh hawj Dahlienx nyi, yawjyawj Dahlienx lau mbouj lau.

(caengz sat)

Ranz Rongh Lo

□ Vangz Sihging / 黄诗歌

Dwg hot fwen ndeu
Eu ndiu le gohaeux ndaekngeungeu
Ndaw fwen miz daek heuh gvej angq
Hix miz ngeu hoenz heux gvaq ngamzfwngz
Dwg vanj mienh ndeu
Rub ndiu le fangzhwnz myoxmywdmywd
Ndaw vanj miz dang duhngaz homswdswd
Lij miz raemxda nyinh ngveihda
Dwg aen sim ndeu
Ciuq rongh le aen mbwn laepnyamnyam
Ndawde miz dangz vannyunmyum
Lij miz gij lwed ndatfofo



Fanh gaiq nazraemx baiz ndaw rungh.

Dozsuh